

筆記小說大觀

集

虞初續志

清鄭醒愚著

第三冊

進步書局校印

虞初續志卷八

清 玉纏鄭澍若醒愚編

周君訥齋傳

楊无啟

周君諱靖字叔甯號訥齋忠介公之冢孫而芸齋先生之子也弱冠通六書之學既長博極羣書亭經籍史蔚為儒宗時汪太史琬以文名重當世與君居密邇嘗招至其家辨析疑義君因摘其藁中訛謬聲音事實厥有數端兼以書相往復太史亦心折焉語人曰此吾之益友也君生有至性孝友篤誠恪守前人遺訓其事芸齋先生也色養備至先生於杖國之年詔君而命之曰吾自先人罹難以來以一身督理家政險阻艱難備嘗之矣今老矣政將及汝汝其勉諸吾不復與聞矣君長跪受命先生於是益從容內養樂其餘年回思昔日拜疏訟寃之時嘔心瀝血不啻如隔世焉嗚乎非有克家之子能盡厥職而能若是乎哉自古修正史者名臣子弟例得附書魏璫之難若魏孝烈先生學洙痛父而亡以及忠介之後刺血鳴寃如芸齋先生者皆當大書特書以光國史者也芸齋即世君哀毀盡禮既除喪乃慨然曰國有史家有狀實相表裏吾家世忠孝豈可令傳聞異辭或失其實致有遺憾乎於是策蹇入

都。臚陳始末。上諸史館。忠介之忠固已光昭日月。而芸齋先生克繼前徽。矢其初志。為遺民宿老者五十餘年。而終得附書於明史。皆君孝思之誠之所致也。君嘗執贄當湖陸公稼書之門。稼書講性命之學。得閩洛正傳。君服習其教。為入室弟子。涵養德性。澹於榮利。遂棄舉子業。絕意進取。葺數椽於忠介塋旁。詩花栽竹。嘯咏其中。有終焉之志。然其遇大事。持大義。輒義形於色。如訟言唐碑有墓之非。真爭湯祠配食之不。曲皆侃侃鑿鑿不少。遜避人。以是畏其鯁直而服其持正也。性樂善好施。朱孝介先生次子。鎡以貧死。久不克葬。君百計圖維以助之。乃始獲歸土焉。族之孤寡酌其輕重。而資其薪水。以至戒殺放生。皆出乎心之至誠。初非好名而祈福也。子二人。曰鳳來。曰鸞翔。咸訓之以義方。申之以勤儉。匪若俗之教子。但孜孜以名利為心也。君宅芸齋。先生憂恪遵古制。堅不茹葷。遂有河魚之疾。繼遺母陳太君喪。則疾愈劇。對人常忽忽。若有失。卒用是不起。所著書有經史隨筆十二卷。雜錄五卷。詩八卷。而篆隸考異一書。識者以為尤可傳云。

楊易亭曰。予素心之交。不及數人。訢齋其一也。徐子侯齋之歿。託孤於予。其塋也。南枝稼堂。共襄厥事。而竭力經營。為將伯之呼。以補予之不逮者。則訢齋之力居多焉。

豈非其風烈固殊乎。惜哉斯人不可作矣。

雜記

高士奇

真大內。見三異物焉。一小金合。大寸有六分。內貯雕刻牙器百種。如几榻舟車盤匱。筆研投壺碁局弦管升斗算子之屬。具體而微。不受手。指用金鉚。鉗而觀之。其一鏤象為球。周身百孔。凡九層。亦有七層五層者。以金簪自孔中撥之。圓轉活動。層層相似。又皆刮磨光澤。中藏骰子一枚。丹碧粲然。其外潔白無縫。非有湊合粘連之迹。名鬼工球。其一酒杯。二十有四。由大及小。如牽堵波。高二寸許。鍍木為之。質黃色。有木理。薄如紙。柔軟而輕。噓氣輒可飛動。然能注酒。三者精巧絕倫。雖有離婁公輸。或亦不能施其心目。不知當時何以摻剔而成。守者曰。此自外國航海來貢。云皆鬼工所作。藏之侈為異寶。今天子曉御宮門。與閣部大臣議政務。退而問視。兩宮暇則與諸侍臣講論道德仁義。日研究乎經史。舉凡奇技淫巧之物。不一寓目。曾有以是言者。取觀之。以為瑣屑。無當於用。遂棄而置之別所。不然。先生烏得而見之。余曰。大哉聖謨。洋洋也。書有之。不役耳目。百度惟貞。又曰。不作無益。害有益。功乃成。不貴異物。用賤物。民乃足。古者聖王臨治。區寓遠近之人。非服食器用。不敢以獻。今此三者足

稱異物。然皆無益於用。使寶而藏之。天下將必有窺。朝廷之嗜好。競以奇技進者。天子有鑒於書之所言。棄而不取也。

畫壁自序

范承謨

承謨蓬頭垢面。繫頸攣手。逢萬壽聖節者三。丙辰三月十八日。肅誠向闕拜舞。

深愧忝生聖世。不克振拔。淪為誤國庸臣。辱親敗子。乘未灰餘燼。志梗概於壁。俾

後之見者。知余不肖不才。所遭不幸也。邈余生而庸弱。先太傅督訓嚴切。冀有成立。

辛卯春。世祖章皇帝。以元勳子。選充侍衛。復以年方幼稚。免入直扈從。令在家讀

書。大慶賀。入班行禮。是年。詔八旗滿漢子弟有文學者。與漢人一體鄉會試。余得登

賢書。明年壬辰。成進士。選庶吉士。甲午解館。授侍讀學士。余病懶性成。常經月不至

翰館。而陞轉之階。反越常次。嗚呼。先皇帝之恩。何以報稱耶。迨先帝龍馭上賓。

余浮沉班末。年餘。循資陞學士。時伯兄充浙東援勦總兵官。先太傅左右侍養無人。

余復以多病。恐曠廢職業。力求解任。辭至再。始得請。歷三載。廷議撤援勦諸路兵。

馬。伯兄歸京師。丙午孟秋望日。闔族集東臯。習射飲酒。諸幼年子弟輩。賦詩屬對。是

日。先太傅顧而樂之。因謂余兄弟曰。吾家世受國恩。爾等乘年富力強。宜速補官。

為國家効力中外。勿以予老為念。申諭再三。不意余兄弟罪孽深重。先太傅於是年八月初二日。棄不肖輩長逝。服闋。補秘書院學士。先是先太傅在日。皇帝尚冲齡。一日余與同官進。內請寶。上詢曰。爾誰氏子。爾父何官。今在否。年幾何。余悉具先太傅始末以對。上喜曰。爾若子耶。如此者數回。後值朝賀期。先太傅入賀。上指問左右而不名。但曰。此非某官乎。且稱說祖宗朝往事甚詳。左右皆驚為異數。余解任後。代余者同眾入內。上問曰。此為誰。范承謨何久不見。閤臣曰。承謨病解任矣。此其代者。上曰。果病耶。劇耶。病愈尚起用耶。對曰。病須調理。一痊即補。上頷之者再。先太傅聞宸注如此。感激益深。因追憶昔年太宗世祖舊恩。輒向北流涕不止。故亟圖報稱之語。時加訓督次年。上親御萬幾。余與同輩日侍左右。至冬巡撫浙江缺人。廷推及余。上色喜。諭曰。浙江東南要地。國計民生。悉委爾矣。可善為之。余受命惶悚。自顧駑鈍。膺茲繁要。晝夜拮据。寢食不遑。而德薄才微。政多闕誤。以致上干天和。旱潦頻仍。蟲疫疊降。二三年間。僕僕山陬水澗。勤荒拯災。請蠲請賑。改折免徵。心勞形憊。幸聖天子愛民如保。凡為民請命之疏。雖部議格不行。上必駁令再議。或徑批如所請行。嗚呼。不才如謨。何幸有此遭遇也。

久之事益繁。食日減。舊疴新疾。交攻。屢體不得已。以病告。上憫念微勞。准馳驛回京調理。維時內而科道外。而將軍總督提鎮巡鹽御史。及兵民商賈。具疏叩闕。挽留者。日相繼。始猶軫恤。病臣未即報允。後乃允提臣請。復留浙年餘。余力疾視事。不敢少懈。會閩督需人。時余以他過鑄級例不准列。上特簡往任。壬子十二月二十

五日。接邨報。是日忽感氣逆之症。攻衝五內。猝病陡險。雖極力調治。時減時發。遂力辭。新命承蒙 俞允因請 陛見。欲面陳病狀。上允之。入都時。即賜 召對。首

詢江浙民生疾苦。暨經由諸處光景。余悉條奏無隱。次即俯問病勢。何似。獎勞備至。親遣 御醫。就舍。診視。賜祕府之方。頒上方之藥。洵無虛日。未幾。以薦舉人才一案。致註吏議。具疏認罪。靜聽處分。兼值舉行察典。內外官三品以上。例令自陳。余因又以病告。期得罷免。藏拙邱園。及 命下。仍令速赴新任。御醫回奏。又云療疾稍痊。可以理事。余感激 主知。不加斥逐。任用彌篤。尚安敢辭。海疆之險。偷衽席之安也。

陸辭曰。上曰。閩海氛未靖。地方困苦已極。為天下第一煩劇要地。卿廉能素著。亦為天下最。故特倚任。仍賜 御衣帽。上廐良馬鞍轡。迥異常數。復 命近侍。就 廷前宣 諭曰。此朕時刻所御之服。解以衣爾。如見朕也。次日入謝。賜宴畢。面

辭就道間關萬里堂上牽衣許國以身不違將母而戀戀君親之心從此與道路俱長矣行至山東界宿羊留店為折臂三公故里其夜賜驥忽殞余嘆息良久知馳驅天末終無功也及踰浙抵仙霞關一望層巒疊嶂瘴霧迷漫險灘怪石奔流急湍中藏猛虎毒蛇磨牙礪爪擇人而噬以故村落荒涼城郭破碎崎嶇甚於蜀道變幻疑於鬼窟履任後諏訪情勢檢閱籍冊不覺失聲大呼曰閩疆之敗壞一至此耶大計軍政所以勸懲文武此省豈無廉能循吏知勇干城而使之淪落一官淹蹇萬狀廉吏勇將之心不堪問矣黜幽糾慝么麼充數而貪酷悍婪日惟苞苴是營安享富貴是執柄者與敗檢者之心不堪問矣學校考取人才干請鬻賄而寒窻之彥百無一聞是奇才異能之心不堪問矣沿海苦兵火者二十餘年有司加耗重徵敲骨吸髓而蠲免之實惠不沾蠹役之魚肉彌甚是父老子弟之心不堪問矣兵卒荷戈守山戍海負隅則有虎豹窺伺則有鯨鯢藉其死力以爭此土而糧餉欠至半年庫銀缺額百餘萬呼庚呼癸之兵心更不堪問矣嗚呼海天半壁危如一綫雖智若良平勇如賁舍亦難展足措手而况蕭牆之禍已釀於撤藩哉癸丑冬部臣入境奉旨藩下左右兩鎮歸地方官管轄余與撫臣劉秉政提臣王進功密議欲量落一二

營分防他處。更勿迫其行。庶不至人心驚惶。進功始應之。而中撓焉。必圖盡遣。以孤其勢。余復密詔之曰。此非孤其勢也。適迫渙散之軍心。驅之附彼也。失計非小。須稍緩二三月。候浙江協餉至。補給舊欠月餉。再預發兩三月銀米安家。然後令彼前往。則途次庶無騷擾。戍所庶無他虞。急之恐倉卒生變。進功雖意折。仍私自調撥。屢催赴戍。及擇期報明發餉起伍。無何果人心洶洶矣。俄而滇逆蠢動。風聞煽惑。訛言沸興。及停止遷移之差。員費命星至。命精忠復縮兵符。因得借口操練兵馬。整頓器械。從前防撥之形迹。催行之舉動。豈不徒滋疑貳乎。身為邊疆大帥。久歷戎行。而不察時事。不揆人心。事未至則剛悻。偏執事一至。即倉皇失度。亦可哀也。已至撫軍為全省大吏。責任非輕。會議之時。畧無可否。竟若置身局外者。不更可嗤耶。余不幸不得同心協力。公忠為國之寮。案而罹於禍。宜也。然予亦不因時艱勢蹙。輒敢廢弛政事。而不急急收拾人心。以為補苴計也。故自蒞任來。條奏諸疏。請速展界者。安民也。請撥現在協餉者。安兵也。請將綠旗官兵。裁去原額。補足者。實營伍也。請免緝投誠逃弁。許投到宥罪。安插本處者。清山。甌。海。溢也。題補城守副將。沿海勞弁者。叙功。苦而邀不次。令之感激報効也。報巡歷邊海一帶形勢。啟行日期者。為欲置身外郡。以

備調禦防範也。再如頒刊示而准採捕者。活溝瘠也。就彌盜而聯保甲者。儲鄉勇也。寬林簡修而招無成者。一安投誠一散島衆也。延林燧董生等因時相機者。撫海逆也。天或假以時日。獲奉俞旨諸事就緒。滇鋒一挫。閩勢自孤。而逆謀自戢。天乎天乎。何竟使余為誤。國庸臣辱親賊子乎。當逆居喪卧病時。余每親至弔慰。乘間輒諷諭以大義。冀感動其心。余客稽子留山。竊慮之。常相告曰。昔魏文貞有言曰。甯為良臣。毋為忠臣。又語云。神龍見尾不見首。公其慎之。舊弁王天祐等亦踴進曰。連日之會。輕蹈不測。左右多戒心。公獨談笑自若。竊窺撫提二公。中懷叵測。不可與語。余俱應之曰。誠然。余非昧於此也。然以孤危之身。處艱難之際。當疑忌之秋。唯示之以誠。使小人無能乘其隙。稍以緩彼之謀。圖濟我事。至於死生禍福。誠不暇計。既委身事主。父母之身。即君之身。而云君憂臣辱。君辱臣死。且予非不知。徒死無益。但時事如此。百無一備。同城共處。舉動牽制上下。左右皆彼腹心。雖日日閉門築壘。其能免耶。皆歎息而退。督標兵馬向稱精銳。聞自李公去世。漸次頹靡。及余來點閱。狼狽不堪。名其實亡。閩安鎮為閩省門戶。履任三月餘。未遑巡視。後見羣情稍安。欲量帶數十名兵弁。往視形勢。而該營將佐。方以賑房什物。弓箭器械。朽壞未整為辭。逆即隨

遣官來言曰。邇日民心稍安。訛言稍息。恐公遠出。又復搖動。少頃撫軍亦來力阻。且為相約曰。某在此久。頗能得彼秘密。有所聞。即來告。共圖報効。朝廷斷不能誤。乃公事。余曰。閩安之行。不過一視海口。非久期長往。既諸公止予。不行亦可。靖藩祖孫父子。叔姪兄弟。世受天家非常寵遇。量無他志。若公忠孝自矢。肯以朝廷之心為心。社稷蒼生之福也。語竟。心輒鬱鬱。退而不能釋。復一客進曰。公既不得看海。何不因滇寇震楚。以設備鄰封為辭。潛出省令。阨據上流。亦一策也。予曰。計過矣。楚於閩相去遼闊。間隔西江。風馬牛不相及。毋論輕舉貽笑。且啟釁端。禍不可解。不見閩安未果之行乎。所攜兵弁。為數有限。尚以諸件未備為辭。今往據上流。誰與為徒。錢糧軍伍。城池人心。一無可恃。今即不量多寡。率爾前往。或據延平。或據建甯。誓死以圖一濟。但彼逆念雖久。逆形未著。倘或疑我據地。欲陰謀之。激變軍心。訛傳京師。風聞者。糾彈於前。按罪者。苛繩於後。既冒輕出。失守之名。兼招激變。殞滅之禍。身名俱喪。取莫甚焉。余不為也。三月十五日甲寅。天初明。逆遣員詣署。跪請曰。王守制數月。未親軍務。今海艘遊蕩。乘滇南多故。萌窺伺心。訛言愈興。眾情愈惑。今新奉固守地方。勅命不敢以私心廢公事。願與諸公會商。為護內防外之策。因喪服未釋。不便

就教。敬遣下員促駕。未幾。撫軍來約。同往詢以所商何事。近有何消息。但支飾他語。雖心竊疑之。乃故坦然共轡。以示無懼。是日。愁雲漫漫。冷霧漠漠。太陽慘淡。無光色。入逆邸中。覺廊廡殺氣。不可以目。予知既陷虎口。勢無退理。挺身而前。仰天大罵。賊眾兵刃環臨。重加束縛。時一二狼卒。有誤持劉臂者。逆黨馬九至。急叱曰。不干巡撫事。東政但俛首無言。兩頰微紅而已。逡巡間。即揮之去。伊惶恐斜趨而出。嗚呼。痛哉。君親倫理。滅絕盡已。余噴血切齒。醜言痛詆。欲激怒以速吾死。度幾上酬主德。下報親恩。乃大罵一日夜。求死不得。又欲不食死。逆每羅列飲食。予斥揮之。舌敝唇裂。齧肉俱腐。罵至第八日。氣雖漸微。聲雖漸細。聞者猶狼藉塞耳。瞋目怒視。又恐余自死。環守不懈。余身層層縲綆。肢體拘攣。不能動作。唯一息尚存。罵聲不已。不意延至第九日十日。而精神頓復。氣之微者漸壯。聲之細者漸宏。側耳其旁者。不以為恨。而反以為奇。嗚呼。痛哉。豈余當死於刀。鋸。鼎。鑊。而不當死於饑。哉。豈予罪深孽重。不能為朝廷守疆土。以致震驚。堂。陛。毒。禍。生。靈。當死於國。法。哉。當此之時。神魂恍惚。常見先皇帝儼然臨於其上。先太傅儼然臨於其旁。即遠而太宗皇帝。先高祖大司馬。余幼所未經身事者。亦親承音容笑貌於夢寐之間。慈誨殷勤。嘉言慰諭。豈

余思念所聚結而為形哉。天錫神聖。默恤余之堅貞。憔悴哉。約計七百餘日之中。著舊日衣帽時。歷寒暑。從未更換。蟣蝨蚊蠅。恣其攢噬。蓬垢疾病。任其纏綿。粥食半盃。便可終日。逆雖時遣問訊。而惡語更加。後亦不敢屢至。防守者見余刻刻覓死。百折不回。感動於中。多方慰解。且為余言。從前罹難時。署中賓客親友及家人輩。俱一被執。凌逼勘訊。桎梏窘辱。艱難慘切之狀。幸皆忠義自勵。視死如歸。不為稍挫。而二三婦女婢僕之類。又能從容盡義。夫婦女子。相繼投繯。嗚呼痛哉。閩之文武大僚。平日建高牙。擁大纛。亦云極一時之赫奕矣。而望塵稽顙。蒙面圖官。保妻子而活軀命者。如雲屯霧匝。獨余賓客戚友。身未邀一命之榮。口未占升斗之祿。感予區區之意。尚能念君父重名節。以身殉孤臣。即健兒奔走之徒。巾幗臧獲之細。皆知寸心不二。臨難不移。聞者得無稍愧乎。余以識闇計疏。波累貽禍。萬死其何恤焉。余居重垣迴壁中。罵未已。繼之以詩文。左右不敢具筆硯。乃燒椽存煤。畫字牆上。其譏刺太毒者。左右旋即塗去。前後僅存若干篇。并為文以序大略。俾見者知。不肯不才。所遭不幸。得死不易云。螺山髡翁炭筆識壁。

鄭醒愚曰。洋洋數百言。寫出驚天動地心迹。此文貞公實錄。豈第有光家乘耶。

公諱雲祚。字子凌。號岱來。南直隸太倉州人。崇禎丙子。舉於鄉。庚辰。成進士。授華陽令。時羣寇縱橫久。海內糜爛。逆賊張獻忠。屢出沒於楚蜀之交。所在殘破。揭竿而起者。漫不可制。公初釋褐。萬里單舸。溯江流。摩賊壘。遠令巖邑。慨然有保障全蜀之志。壬午四月。甫視事。即以計擒誅狡賊秦纘勳等。先是蜀有搖黃賊之禍。秦纘勳者。川東石碓土司秦良玉之族也。潛伏內地。為賊耳目。已并其黨。誘執之。寘於獄。夜半殺獄卒逸去。吏請閉城大索。公曰。無張皇擾民。無益也。潛發書土司。授以方畧。土司果擒賊至。悉斷其手足。指矣。吏驚以為神。公曰。吾策之審矣。賊踰獄。必以石碓為逋逃藪。秦夫人方以勦寇効節朝廷。詎肯庇纘勳而隳功名乎。於是立決殺之。甲申正月。獻逆破夔門而入蜀。中大震。公知事迫。屢至蜀府請見。欲為王陳守禦之策。不應。而內江王雅信公。公乃欲藉內江得之蜀。往說內江曰。人無愚智。皆知賊勢披猖。成都必及於禍。今蜀府貨財山積。不及今捐之。募死士。東向殺賊。一旦豕突疆場。軍民奔逸。誰為王守此府庫乎。愚者歛財。而府禍智者轉敗。以為功。蜀中有險可憑。有兵可戰。特患無財可用。誠不愛萬金之賞。鼓勵行間。臣等身編行伍。效死爭先。上賴朝廷威

靈猶可埽除寇亂保全家國不然拱手授賊無為也且獨不見周楚之已事乎先闡
逆圍大梁周王下令斬賊一級賞五十金賊以是不克而去獻逆破武昌閱楚府私
藏笑其有財而不知用公以是激內江內江心動入為蜀王言之王內惜金錢苟幸
無事以祖制辭公見王府擁財不發大吏握兵束手一縣令子立危城欲戰守而無
虵蟻蟻子之卒欲召募而無斗粟束芻之餉張空拳上下叫號義舉動掣肘蓋至是
而知事不可為不待城亡罵賊之日已自分必死矣三月闖進陷京師先帝殉社稷
六月獻逆破重慶殺巡撫乘破竹之勢鼓行而西所過無堅城縱火焚掠數百里煙
焰屬天漏刃餘民扶老攜幼號哭道路西奔者日夜不絕是月成都火器局無故火
發燬廬舍軍民死無算人情益洶洶疑肘腋皆賊蜀藩始懼悔用公言不早南出財
佐召募而賊已水陸薄城下矣八月五日御史劉公之渤總兵劉公佳胤乘城而守
總兵出戰大敗奔還賊乘勢急攻三日城陷蜀王率其妃嬪自沈并總兵走死浣花
溪公與劉御史及理刑劉士斗成都令吳繼善等俱被執幽於大慈寺是時賊有眾
百餘萬據名都雄視全蜀謂天下不足定將即偽位乃遣其黨即幽所饗諸文武欲
降之以備百官而臨以白刃賊固屬意諸大吏也公奮然怒從眾中躍而起手擲案

大罵逆賊死萬段。指其口曰：有口食賊肉耳。豈食賊粟哉？公長軀雅度，至是氣憤盈目，光炯射鬚髯，戟張擅袖，指賊罵聲響撼廊廡。出賊不意，相顧錯愕，奔告逆。遂殺公。時年四十有三。兩劉公亦同日死之。嗚呼！公自聞警以來，已決計於死，而今果死矣。當日法吏戎臣，伏節而死者相枕藉，舍生取義，豈獨難一縣令？然是日為縣令而死者，獨有公，則公之死，又似不易也。夫人臣之義，未有陷賊而不死者，彼倖生者，何人歟？於是而知公為得死所矣。余曾謁公於華陽，語及寇亂，歎息國論之失於操縱，坐使中原流離，益州天府已殘燬不支，而文法煩密，雖有豪傑，欲自奮不能。國家事正未可知。萬里孤臣，死不知所，語次慷慨，余以為公悲之。至是道路籍籍，果傳沈知縣獨死賊矣。乙酉十一月，義師復雅州，有反正參議郝孟旋道其事，而參將鄒振從賊中來，稔其死時狀，謂獻逆怒公，揮眾叢刃之，骨肉為醢，始得其詳。聞公妻子尚有存者。余訪得之於九溪山，其戚張士偉以公之子來見，僅八齡。士偉為余道：挈公遺孥奔走流離，瀕死而生。且述秦纘勳事，謂公臨事曉暢，機宜發策，洞中竅，要使當日少用其言，不以繩墨束縛之，使得展布四體先事辦賊，即未能滅賊，必不至為賊所破。縱大勢不可為，亦當如巡遠百戰殺賊少伸忠臣義士之氣，惜乎其未遂也。相與流

涕久之。士偉江南奇士。有經濟才。余檄之。權洪雅令。能畫策佐軍需不乏。無何死於職。未竟其用。至今惜之。

論曰。余次序華陽公事。而知守節死義之臣。天之所屬意。必有所以扶持於其間也。方賊之斬艾蜀民。搜牢仕宦。數千里埽地無迹。即畏死而降者。往往齟齬不遺。而華陽之寡妻弱子。獨能脫其身於刀塗血道之中。雖提攜捍禦之有人。亦天之憫其忠而不忍使之無後也。天步方艱。尚闕褒揚贈卹之典。一旦皇路清彝。訪求死事孤忠。則公之食報於身後者。宜何如其俊偉乎。第恐其子語焉而不詳。士偉既死而無所。故傳其大節以授之。且名之曰世廕。以竢諸異日焉。

鄭醒愚曰。英氣凜然。讀之令人毛髮欲豎。

虞初續志卷九

清 玉纏鄭澍若醒愚編

啞道人傳

徐岳

啞道人不知其名。姓以其口不言書。以代語。遂呼啞道人。道人往來齊魯間。久漸有知其生平者。云道人少讀書。為諸生。有聲庠序間。以敗檢為學使者褫其衿。走遼左。從軍。其拳勇過人。從小校至偏裨。後失律。應誅。亡匿羣盜中。標掠海上。久乃遁去。隱僧寮。道院間。遇異人。授以修煉之術。乞食市中。舉動顛狂。往往手指其事。或書一二隱語。多奇中。有疾者求之。或以藥。或以所乞食與之。無不愈。一日。值淮陰司理出。道人以一紙投之。大約云與生前有緣。指點司李心事。募其備一棺。于某日化去。司李如其請。道人遍指諸熟識家。謝屆期沐浴坐棺中。舉手向送者拱揖而逝。舉之甚輕。若無人者。夫道人為諸生。則敗檢為裨將。則入盜黨。是烏足以語道。而異人授之。超舉之術耶。豈所謂放下屠刀。立地成佛者。固所不論耶。及其得道。而顛而啞。則又濟顛之酒肉。寒山拾得之垢污也。異人行徑。往往有然者。

左忠毅公逸事

方苞

先君子嘗言鄉先輩左忠毅公。視學京畿。一日風雪嚴寒。從數騎出。微行入古寺。廡下一生。伏案卧。文方成草。公閱畢。即解貂覆生。為掩戶。叩之。寺僧則史公可法也。及試。史呼名至。史公瞿然。注視呈卷。即面署第一。名入。使拜夫人曰。吾諸兒碌碌。他日繼吾志事。惟此生耳。及左公下獄。史朝夕獄門外。逆闔防伺甚嚴。雖家僕不得近。久之。聞左公被炮烙。旦夕且死。持五十金。涕泣謀於禁卒。卒感焉。一日使史更敝衣草屨。背筐。手長鑊。為除不潔者。引入。微指左公處。則席地倚牆而坐。面額焦爛。不可辨。左膝以下。筋骨盡脫矣。史前跪。抱公膝而嗚咽。公辨其聲。而目不可開。乃奮臂以指撥眵。目光如炬。怒曰。庸奴此何地也。而汝來前。國家之事。糜爛至此。老夫已矣。汝復輕身而昧大義。天下事誰可支柱者。不速去。無俟姦人構陷。吾今即撲殺汝。因摸地上刑械。作投擊勢。史噤不敢發聲。趨而出。後常流涕述其事。以語人。曰。吾師肺肝。皆鐵石所鑄造也。崇禎末。流賊張獻忠出沒蘄黃。潛桐間。史公以鳳廬道奉檄守禦。每有警。輒數月不就寢。使將士更休。而自坐幄幕外。擇健卒十人。令二人蹲踞而背倚之。漏鼓移。則番代。每寒夜。起立振衣裳。甲上冰霜迸落。鏗然有聲。或勸以少休。公曰。吾上恐負朝廷。下恐愧吾師也。史公治兵。往來桐城。必躬造左公第。候太公太

母起居拜夫人於堂上。余宗老塗山左公甥也。與先君子善。謂獄中語乃親得之於史公云。

俞老僕墓誌銘

馮景

老僕姓俞。名文。金華人。少讀書。明大誼。身長八尺。軀幹魁偉。廣眉修髯。耳長三寸許。發聲如鐘。為仇家所陷。囚於獄。吾父出之。德焉。委身為奴。老僕性嚴。未嘗見齒。儕輩憚之。然事主謹恭。老僕折薪姑蔑山。家中爨不乏。嘗山行遇虎。挺擊之。斃。人勸勿再往。老僕不應。其婦哭而牽其裾。老僕怒叱曰。人生聽命於天乎。抑聽命於虎耶。絕祛以去。時年七十矣。予兒時好嬉戲。老僕常柔聲規誡。予易之。不以介意。數抽棘為矛。與鄰兒十輩戰于園。皆蒲伏而歸。老僕有子。年與予齊。亦名之使戰。老僕聞。咨子數十。予始憚。老僕從此罷嬉。老僕在家日少。歸必問予所讀章句。請誦之。熟則大喜。以山中五色文石獻予。予樂焉。每歸自塾。釋書於几。揖父母起居畢。徑詣灶下。望薪有無。以驗老僕至否。蓋予年十二。猶數望薪。老僕一夕醉。進諫曰。官乎。此非弄石時矣。日長矣。炎去成人。幾何不書之。愛而石是好。蘭溪之石可勝。既乎失時。不學負老奴矣。其聲益微。予悲傷其意。且心忤。遂大奮於學。康熙癸丑秋。敞廬火。老僕年七十九。

左擔而趨出於火中者。率為人奪去。惟老僕不失一物。至今又十許年。耄矣。不能入山析薪。猶自扶杖至江干。問薪價低昂云。老僕在予家三十八年。未嘗一日病。今丙寅夏。卧牀不起。聞予自淮歸。強起謂其婦曰。扶我謁相公。老僕於予凡易三稱。兒時曰官。壯有室。則曰郎。予遊京師。上書當塗。名聞天下。老僕歎曰。此真相公矣。遂稱至今。蓋予自童而少。而壯。老僕三易稱。而予髮益種種矣。悲夫。老僕享年九十有二。沒之日。予見薪而泣。明日。執爨者告市薪。予益泣。飲之加禮。葬於不食之地。遂誌之。而賜以銘。銘曰。

其僕則名其實士。李元蒼頭畧相似。

鄭醒愚曰。俞之樸勤。具有至性。他人欲勉為之不能也。

記呂尚義破賊事

李紱

大庾縣民呂尚義。世居南源山下。其地在大庾崇義二縣之間。土田肥美。然界連廣東。層巒峻嶺。山有錫礦。礦徒出沒峒老。則亡為盜賊。剽掠村莊。人莫敢居。惟尚義結廬其下。數十年。賊莫能害。尚義與妻俱善用鳥鎗。發無不中。施攻尤敏。十步可放三鎗。每遇賊至。夫婦二鎗。連環不絕。歲殺賊無算。賊恨尚義刺骨。康熙四十年。有廣東

萬猴山賊渠蓋某率賊二百餘人。白日持鎗礮過大庾嶺。昌言將往南源。殺尚義。復仇。南安參將營兵莫敢阻拒。聞之贛鎮楊鈞。隨遣二守備率兵數百人往捕。比至南源。則賊已為尚義擊敗。竄匿山谷矣。時尚義妻已沒。一女亦能用鳥鎗。父女二人共殺賊五十餘人。其餘匿山谷者。尚未解散。官兵以林深箐密。莫敢搜捕。尚義慨然前行。曰。第隨我來。賊可盡得也。尚義鷹目洞微。見遠茅草中有伏賊。百步外能見之。發鎗即中。咸驚起。遂踰山以逸。官兵環視不敢捕。惟得沙礮三位而還。崇義高令尚瑛。召尚義至衙。予酒食。賜銀欲署為捕頭。大庾令亦欲委之。彼此列狀爭于府。蓋二縣俱有山賊。惟尚義所在。則賊不敢犯也。尚義俱謝不受。委曰。吾農民。不願充役。但兩縣官長為安靖地方計。吾所居在兩縣間。何敢辭勞。南源一帶。吾女在。可無事。其餘兩縣地方。但有山賊。吾願隨官兵往捕。賊聞吾至。即逃矣。於是兩令大喜。厚賜而遣之。然廣東礦賊自是役大創。亦不復至南安云。時鑲紅旗祝公鍾賢為南安守。公子兆龍親見其事。兆龍與余同在八旗志書館。為余言其端末如此。余惟古稱弧矢之利。以威天下。至兵刃既接。則有以氣與力為強弱者。自明之初年。西洋火器入於中國。遂為軍中無敵之技。雖由基之巧。項羽之氣。烏獲之力。一鳥鎗殺之有餘矣。雖然。

習其技者。貴精。主其事者。貴勇。技不精。則手心不相應。施放鈍拙。不足以制弓矢。志不勇。則臨敵倉皇。失措。往往棄利器。為敵用。若呂尚義父女二人。烏鎗可連環不絕。技已甚精。以二人當二百餘人。而氣定神閒。不為賊亂。則勇亦殊絕。使天下為將弁者。盡得尚義輩效馳驅。豈不皆精兵哉。兵不必皆精。而尚義輩特以山居老。余故為太息而記之。

鄭醒愚曰。具此奇勇。迺謝不受委。品地亦高。

書王士俊

袁枚

田文鏡總督河東。以不喜科目。聞王士俊宰祥符。謁田。田問出身。王眉蹙。口溢。若為萬不得已者。而對曰。士俊不肖。某科翰林也。田以為測已愈惡之。每見。嗔喝吹毛索疵。王憂憊不食。幕府客裘香山高士也。被酒大言曰。制軍有意相督。過將早晚劾公去。無名可惜。不如擇一有名事去。問何事。曰。今新增河南鹽民。不能堪。公以狀啟田。田必據此劾公。公雖去。公名傳矣。曷若萎腰授印。低頭出衙乎。王深然之。繕稿數千言。通牒大府。布政使楊文乾心嫌田所為。而屈於勢。不能言。忽得王牒。驚曰。此何時。尚有奇男子耶。呼僮焚香。供牒再拜。遲明。田果具疏劾王。楊佯助田。怒謾曰。狡哉。

王令知公憎之。故借此求名。若據彼牒劾奏。是落伊度內也。且罪止罷官。不如姑舍是。而別摘他罪中之使轉身不得。田頴之王感楊恩。私誓如父子。然亡何。天子擢楊巡撫廣東。士俊送出境。悲不能自止。楊亦泣然曰。事未可知。何忍遽別。姑行一驛乎。既又留之曰。事未可知。姑再一驛乎。王自度無全理。惘惘相隨。忽見北來飛騎。捧黃封授楊。楊下輿北向。九叩首。招王曰。我乞汝同往廣東。天子許以府道用矣。速歸辦裝可也。王至廣東。授肇高廉道。尋擢布政司。田文鏡卒。竟督河東代其位。

書魯亮儕

袁枚

己未冬。余謁孫文定公於保定制府。坐甫定。閻啟清河道魯之裕白事。余避東廂。窺偉丈夫。年七十許。高睚大顙。白鬚彪彪然。口析水利數萬言。心異之。不能忘。後二十年。魯公卒已久。子奠於白下。沈氏縱論。至於魯。坐客葛聞橋先生曰。魯字亮儕。奇男子也。田文鏡督河南。嚴提鎮司道以下。受署惟謹。無游目視者。魯効力麾下。一日命摘中牟李令印。即攝中牟。魯為微行。大布之衣。草冠。驅驢入境。父老數百扶而道苦之。再拜問訊曰。聞有魯公來代吾令。客在開封知否。魯謾曰。若問云何。曰。吾令賢不

忍其去故也。又數里見儒衣冠者，簇簇然謀曰：「好官去可惜，伺魯公來，盍訴之。」或搖手曰：「咄！田督有令，雖十魯公奚能為？且魯方取其官而代之，甯肯捨己從人耶？」魯心敬之而無言。至縣見李貌温温奇雅，揖魯入曰：「印待公久矣。」魯拱手曰：「觀公狀貌，被服非豪縱者，且賢稱噪於士民，甫下車而庫虧何耶？」李曰：「某滇南萬里外人也，別母遊京師十年，得中年借俸迎母，母至被劾，命也。言未畢泣。」魯曰：「吾暍甚，具湯浴我，徑詣別室，且浴且思，意不能無動，良久擊盆水誓曰：『依人而行者非夫也。』具衣冠辭李。」李大驚曰：「公何之？」曰：「之省與之印，不受，強之曰：『毋累公。』魯擲印鏗然厲聲曰：『君非知魯亮儕者，竟怒馬馳去。』合邑民焚香送之。至省先謁兩司，告之故，皆曰：『汝病喪心耶？』以若所為，他督撫猶不可，况田公耶？」明早詣轅，則兩司先在，名紙未投，合轅傳呼魯令入。田公南向坐，面鐵色，盛氣迎之。旁列司道下文武十餘人。睨魯曰：「汝不理縣事而來何也？」曰：「有所啟。」曰：「印何在？」曰：「在中。」曰：「交何人？」曰：「李。」令田公乾笑。左右顧曰：「天下摘印者甯有是耶？」皆曰：「無之。」兩司起立謝曰：「某等教勅亡素，致有狂悖之員，請公并劾魯。」付某等嚴訊朋黨情弊，以懲餘官。魯免冠前叩首，大言曰：「固也。」待裕言之，裕一寒士，以求官故來河南，得官中年，喜甚，恨不連夜排衙視事，不意入境時，李令之。

民心如是士心如是見其人知虧帑故又如是若明公已知其然而令裕往裕沽名譽空手歸裕之罪也若明公未知其然而令裕往裕歸陳明請公意旨庶不負大君子愛才之心與 聖上孝治天下之意公若以為無可哀憐則裕再往取印未遲不然公轅外官數十皆求印不得者也裕何人敢逆公意耶田公默然兩司目之退魯不謝走出至屋雷外田公變色下階呼曰來魯入跪又招曰前取所戴珊瑚冠覆魯頭歎曰奇男子此冠宜汝戴也微汝吾幾誤劾賢員但疏去矣奈何魯曰幾日曰五日快馬不能追也魯曰公有恩裕能追之裕少時能日行三百里公果欲追疏請賜契箭一枝以為信公許之遂行五日而疏還中牟令竟無恙以此魯名聞天下先是亮儕父某為廣東提督與三藩要盟亮儕年七歲為質子於吳吳王坐朝亮儕黃袂衫戴貂蟬侍側年少豪甚讀書畢日與吳王帳下健兒學贏越勾擲塗賭跳之法故武藝尤絕人云

鄭醒愚曰奇人奇事得此妙文傳之可稱雙絕

女李三傳

胡天游

女李三者河南鹿邑縣人也父某單貧業田嘗以隱事與邑大豪相恨疾豪陰謀殺

之使客陽與親召之酒而樂以飲遂發病。心知豪所為將死。女從母泣於前。某斷齒切叱曰。若何泣。若非我子也。且吾為人殺。幸有兒。俟壯。或行能復仇。若眇子。覺稚。後無望也。吾恨終不吐矣。女時年十餘。聞父言。晝夕憤喪。時時蓄報豪志。比數歲稍長。日誓鬼神。往祝某墓。願魂魄相助。挾利刃候道上。期乘便刺豪。豪出入乘馬。從僮奴彪彪然。勢不得逞。乃幻人為詞。屢懇有司。大吏咸徧列於官者三年矣。一人無肯白其事者。女甚恨曰。此曹雖官人。實盜隸耳。徒知探金錢。取醉飽。何能為直。冤痛者乎。遂辭其母。當呼枉京師。鹿邑道京師二千里。女孤弱。無相攜挈。慷慨行。暮託逆旅。逆旅主人或怪其獨來。疑有他。固不內。則潛伏草間。既至。將擊登聞鼓。自訟。數為吏所闢。以陳於刑部。與都察院交格之一。如有司大吏之在河南者。久之。會有新任令於鹿邑者。頗強直任事。女聞。乃走還。令方升車出。遮前大呼。且涕且陳。伍伯箠驅不能動。令以某死深歲月。且無驗。意其未信。更詰得死時語。及奔京師狀。乃為受牒縛鞫。客與豪皆自窮服。昔者荆平王既殺伍奢。子胥亡之。江東卒覆楚國。而鞭平王之屍。李嵩戕蘇謙謙。子不韋變姓名。穿室掘冢。以刻其報。然必藉闔廬之威。兄弟賓客之助。若夫窮持孤露。挾持靡因。冒釁忍險。以終立乎。事無負乎。志然則子胥之謀。非足

以為勇不韋之奮非足以為烈也。緹縈沈痛而上書。曹娥憂思而沉江。或有揚刃於都亭。或假貸庸以襲仇。其赫爾著於世。其於古何如也。今已論正豪罪。未即決。豪死牢戶中。豪家滋憎女甚。構宣謗詞。以為嘗受活。有邑公子。獨心知女賢。請聘之。其母與長老姆媪皆勸之行。矢不許。及母卒。殮埋。悉召宗族親戚里隣。告之曰。吾痛父見害。楚毒幾十年。幸得雪仇。而名為人垢。忍不早就死者。傷無兄弟。終奉老母。今吾大事已。其將有所自。明室而掩之。遂自絞也。於是豪子暮拍之。突視其面。個猶生然。將舉刀斷之。有血激諸口。類噴怒者。豪子駭仆不能動。左右亟扶負歸。亦竟得疾以死。女死康熙中。至今且五十載。歲戊午。予居長安。始聞。感當世無能文章。揚洗昭暴之。使家說戶唱。相有爭勸。乃撰述其事。歌而系之。

毛生

樂宮譜

前明熹廟時。天下多故。盜賊充斥。錦帆綠林之徒。所在多有。洪州數舉子入都。挾資頗重。道淮徐之間。一少年求附舟。叩其所自。自云施姓。蓋亦應春官試者。為獨行。恐盜故來。語作吳音。窺其行李。衣冠似是烏衣子弟。既入舟。取筭中佳茗煎以江水。遍飲同袍。俊語名談。傾一座。眾皆悅之。以為良友。恐不得當也。已而江岸夕陽。亂流明。

滅。孤舟泊蘆葦間。少年進曰。江天暮景殊佳。某有短笛。願為諸君一奏。遂擲管倚蓬。吹之。悠揚數弄。直使魚龍驚飛。蟾兔欲躍。眾皆擊節曰。桓伊李年。今復生矣。語未畢。忽一豪客躍入舟中。持一鐵柄傘。奮擊少年。墮水死。呵曰。忤奴不丐食村落。來此奚為。眾視其人。形容怪偉。鬚髮林林如豎戟。皆駭極仆。跌結舌。重呼曰。賊賊。客曰。公等非赴試者耶。曰。然。有重資耶。曰。有之。願獻賊。賊毋殺我。客笑曰。余不殺賊。賊真且殺公。適吹笛號眾者。是也。眾皆起謝客曰。賊眾且悍。夜將報余。畏者可暫去。前三里村高翁店。一宿無患也。不畏者。留更看。余殺賊於是去者半。留者半。客戒留者先寢。聞呼則起。視自引酒狂飲。連飛數十觥。不醉。飲罷。取鐵柄傘枕之。卧鼾聲如雷。霆眾假寐。俟之。夜半。忽聞客呼曰。賊至矣。挾傘踞船頭。時月黑星繁。微辨人影。一賊持刀奔客。曰。若殺我弟。我今取若頭。客不答。即舉傘格之。賊應手而仆。刀槩環進。客從容揮傘。呼呼作風聲。與蘆葦瑟瑟相應。賊左右撲刺落水。餘賊奔逃。客已奪得賊弓矢。連發射之。盡告斃。觀者股栗。汗流浹衣。裾客忽挾傘入艙。坐神氣灑然。眾酌酒勞客。復飛數十觥。掀髯謂眾曰。公等窮年咕畢。足跡不出三里外。甯知世路之嶮巖哉。眾唯唯。又曰。國家求才待用。自維有其具。則進苟平平。甯坐床頭。弄稚子。無以父母之身。輕

飼虎狼之口也。今第行無畏，眾羅拜曰：「向者不敢啟問，今將軍活我，恩厚矣，願聞姓名。」以圖報效。客悉扶之起，舉傘扣舷曰：「余亦舡將軍，亦無姓名，亦不望報，吾去矣。」一躍而逝。既而春闈，一舉子逢客於號舍，心訝此君能挽兩石弓，復能識丁字，真異人也。趨前問無恙，客睨視若不相識，亦不即答。入號熟寢，窺其舍，鐵硯斑管各一，別無長物。初不敢呼問，客直睡一晝夜，不少寤。次日午晌，舉子文已畢，將繕寫，心德客慮其沉睡，將不克終卷，欲以己餘勇賈之，遂呼客。客大恚曰：「豎子敗吾事，斷送會元矣。」舉子踉蹌不知所對。既而客嘆曰：「毛生毛生，豈非命也！夫千金之璧，當首貢玉廷，安能隨行逐隊自居牛後，為渴睡漢，揄哉！今以吾文與公，可獲亞名，亦不負公數千里冒險跋涉也。」索紙書之，風行海湧，三藝立成，擲於舉子之前，曰：「吾去矣。」即挾空卷投有司，稱疾而出。舉子閱其文，允稱傑構，書法亦矯健非常，嗟嘆不已，因棄己作書，客文以進，果成進士第二名。

非非子曰：余聞鄉先生述毛生事甚悉，惜失其名字，嗟乎！天地奇氣，必有所鍾，畸人傑士，宜不絕於世。顧有幸有不幸，斯隱顯異焉。使毛生建高牙，擁大纛，虎奮鷹揚，立功萬里外，則班衛之勳，豈多讓哉！即不然，以彼其文，掇巍科而冠多士，秉筆詞翰之

林亦足與枚馬鄒揚輩爭烈。何至霧鱗雲爪首尾不詳。若是哉。昔宋景濂錄秦士余紀毛生文雖不逮。有同慨云。

老僧辨奸

沈起鳳

嚴分宜未貴時。與敏齋王公讀書菩提寺東院。一日同閱荆軻傳。至樊於期自殺處。嚴曰。此騷漢也。事知濟不濟。輒以頭顱作兒戲耶。遂大笑。王曰。烈士復讐。殺身不顧。志可哀也。遂大哭。又閱至白衣冠送別時。嚴復大笑曰。既知一去不還。迺復遣之使去。太子丹真下愚也。王又大哭曰。壯士一行。風蕭水咽。擊筑高歌。千古尚有餘痛。繼閱至囊提劍斫箕踞高罵。嚴更笑不可仰。曰。是真不更事漢。不於環柱時殺之。而乃以嫚罵了事。王更涕泗沾襟曰。豪傑上報知己。至死尚有生氣。銅柱一中。祖龍亦應膽落。一時哭聲笑聲。喧雜滿堂。一老僧傾聽久之。嘆曰。哭者人情。笑者真不可測也。二十年後。忠臣義士無遺類矣。後王官中牟縣令。頗有政聲。而嚴竟以青詞作相。專權誤國。植黨傾良。為明代奸邪之冠。老僧預知之而不能救。殆佛門所謂定劫歟。鐸曰。傳言愚忠愚孝。有旨哉。古之亂臣賊子。皆聰明絕頂人也是故。不重才而重德。

新會兩生傳

車騰芳

阮大年者。明季新會諸生也。少落魄。不修邊幅。在諸生中。亦無所知名。獨事母孝。母歿。負土成墳。日至墓所。旋繞而哭。三年。以為常。甲申歲。聞神京陷。崇禎殉國。即慟哭不食。久之。乃食。或謂之曰。聞賊入京城。諸肉食者。皆乞憐馬蹄下。得美官。子獨何為。曰。嗟乎。此予所以欲死也。即日為號。召其鄉人。欲以舉事。逾數月。無應者。乃駕扁舟。走厓門。哭於楊太后廟中。沿涯。蛋民聚而觀之。皆為感泣。生為陳說忠義。論以舉事狀。即皆應曰。諾。願從君所為。生知其可用。乃徧閱漁舟。可百餘艘。人可四百餘眾。乃復為約。令卜日。與俱。屆期。而李生適至。李生者。名子儼。亦新會諸生也。素謹厚。家故饒。值歲洊饑。出粟以賑鄉人。德之比聞。國變。乃率其鄉人。書大行皇帝為位。以哭於家廟中。遠近來觀者。皆感泣下拜。生曰。自高皇帝創業以來。迄今垂三百年。我等祖父子孫。皆食其福。生為明民。死為明鬼。不亦可乎。中有壯士三十餘人。攘臂前曰。苟君舉事。有不從死者。非人也。生曰。盍書名。於是旬日間。得五百餘人。是時新會巨盜聚夥崑崙山中。時出肆掠。生使人往招之。則皆如約。合之得千六百餘人。生乃毀其家。具舟筏。備芻糧。刻日偕赴。及聞阮生在厓門。欲過與俱。初二子。素不相識。及相見。抱持大哭。一時旁觀者。皆髮指。皆裂憤不欲生。生曰。今留都擁立有年矣。盍往赴之。

眾皆如約。乃從海道進發。至中途。颶風大作。覆溺漂散者幾半。逡巡久之。將及崇明。聞留都已敗。諸從行者亦稍稍散去。兩生知事不濟。獨與數十人反其鄉。比聞台州監國。而閩越互相水火。皆策其無成。故未動。居久之。聞黎遂球舉事贛州。聲頗振。決往從之。乃與家人訣。時左右無一人從者。獨二子携持同行。踰庾關。下贛水。謁黎於軍門外。時遂球軍令戒嚴。為其鄉人也。見之。即問兩生來意。對曰。欲從公覓一死所耳。遂球以其言不利。姑置之。未幾。我大清兵南下。城陷。遂球遇害。二子各持短兵。力刺數人。皆死於亂軍中。

論曰。予側聞新會兩生事。野史所不載。詢之故老。罕能言之。方忠愍公與難時。有蒼頭某者。自軍中逃回。後至八十餘歲。每為人言兩生死事狀甚悉。而新會阮又咸大年族子也。亦能記兩人起事時事。皆歷歷可信。夫二子者。可不死也。乃決於一死死而人莫之知也。悲夫。

楊孝子傳

毛奇齡

嘗讀典例。無有以刳臂割肝旌孝子者。故西河出游。人以刳臂事屬傳。必謝之。或不。得已。稍見之雜文。如題吳門沙孝子卷。如新安程舉人事。母狀如為京口。汪將軍記。

事如錢塘方氏母子五人節孝錄序而獨於上海楊孝子則不然孝子名文蔚本浙之上虞人其父榮生員在明天啟間隨其所親宦上海而家之康熙丁未父病時年八十七孝子走廁偷嘗其糞甘號於天請身代不得竟死越十年母病見血中死法醫者凡數輩皆前後相顧去孝子獨念父危死不救今復然生男何為也世已無鍼石燠灼豈湯體亦告絕者闔戶卦左臂以其肉襍復汁護之三護三進母初進而體下再進而赤澤以去三進而愈時康熙丙辰九月二十一日又二年戊午上海令任君廉其事請告之臺將獎之孝子泣曰是欲重我以迂德也且予何如人其敢以迂德越典例再拜固辭固強之不受乃為之題其門曰以身壽母而請西河為之傳西河氏曰予兩過上海未得訪所謂孝子者而見之也予友丁明府曾與之游每盛稱其人謙而和恭而能容輕財好義而不自放於俠烈人以孝稱之必變色踉蹌却不受每月吉必詣城隍祠禱之願減年以益母年然秘不令諸兄知若惟恐以獨行傷兄意者方母病時體羸甚又年高將彌八十耄而曠以為不療即療必不能康強如平日乃既愈又健皆眊眊不知所為丁明府曰孝子將卦臂束臂以兩麻令肉境起然後迫噬之而脫之以乃故其創甚鉅骨露凡一百二十日始合創人不知也又曰

初以臂肉鉅雜復獲之。揚其膏令竭。屢獲屢竭。今所餘臂肉猶有重至八銖外者。嗟乎。孝已別有雜贈時文卷附傳後。

鄭醒愚曰。孝欲令人知。必不能為此苦孝也。楊孝子之所以獨有千古也。

張獻忠降生記

李調元

李祖惠言。延安府膚施縣有林生者。縣之柳樹澗人家貧苦讀。試輒不利。舌耕於金明驛之東土橋。遺妻守舍。紡績自給。塾去家兩舍。一日歸省。未至家。天已昏黑。愁雲密布。少頃大雨如繩。遂避雨於道旁古廟中。廟三楹。牆垣倒壞。無住持。中有神像一座。金衣剝落。神前有破香案。亦欹斜將圯。意待雨少霽。即行而飛霖愈猛。雷電交作。遙望村火點點。簷外泥深三尺。跬步難行。無如何。遂坐於香案下。假寐。忽見兩廊人夫喧闐。騶子奔馳。洒掃階道。旁有大厨。豕羊羅列。宰夫數十百人。鸞刀縷切。堂上燈燭輝煌。龍文鳳綺。供設甚盛。中一人緋衣。平天冠。似王者規模。指點手下。安排几桌。結綵張筵。旁列鼓樂。似人間地方官伺應。上司狀探馬卒。絡繹不絕。鬧擾之聲。爆火之光。徹內徹外。少焉。忽有飛報者云。煞星下界矣。緋衣人即踉蹌趨出門外。祇候甚恭。林生亦從稠人中遙望。見雲端冉冉一簇人馬。擁乘輿飛奔而下。兩旁皆仙娥媪。

綠環夾左右笙簫縹緗響。過行雲漸漸前導。至前。緋衣人又疾趨數武。至道旁拱立。貌益恭。乘輿忽墮。廟外。喝。駐輿中。走出一人。赤髮藍面。巨齒獠牙。獠甚。即大步入。緋衣者。謹隨後。至大廳。赤髮人直上座。畧不叙賓主禮。緋衣參揖後。即趨側席陪坐。赤髮人坐定。即拍桌呼曰。飯來。飯來。莫悞我事。緋衣人即呼階下數十青衣。舁餐盤而上。珍羞羅陳。大率皆人間未有。其隨來人眾。俱有供給。在兩廊下。一時鼓樂齊鳴。歌舞畢。備饌畢。又青衣數十。爭上徹席。緋衣避席拱立。言曰。今日星君下界。雖奉上帝勅旨。亦萬民劫數。但瞞忝東嶽。以好生為心。伏乞十分中。暫留殘喘三分。則庇德非淺。言訖。又復恭聽。赤髮者初聞若怒。既見上下俱款洽。隆至。有赧色。微領首而起。大步出門外。隨者皆擁護。緋衣人仍送出。旁候乘輿。一片光明望之。投已村中。而沒。林生牽從。緋衣侍者密問之。此何人。答曰。汝學生也。一驚而醒。則身猶在香案下。東方已白。簷溜漸稀。雨已晴矣。視廟榜。乃東嶽也。遂趨步歸。至家。妻啟戶出迎。林生見桌上盛喜雞子一盒。問之。妻答曰。昨晚比鄰張嫂誕子。所送也。林生異之。後五歲。張翁送其子入塾。從讀。改名獻忠。年餘不能記一字。翁遂使牧牛。又無賴。往往從羣兒撲戲。及長。漸為狗偷。充本縣快手。不數年。為流賊。林生老猶在焉。

徐靈胎先生傳

袁枚

乾隆二十五年。文華殿大學士蔣文恪公患病。天子訪海內名醫。大司寇秦公首薦吳江徐靈胎。天子召入都。命視蔣公疾。先生奏疾不可治。上嘉其朴誠。欲留在京師効力。先生乞歸田里。上許之。後二十年。上以中貴人有疾。再召入都。先生已七十九歲。自知衰矣。未必生還。乃率其子熾。載楸村以行。果至都三日而卒。天子惋惜之。賜帑金。命熾扶襯以歸。嗚呼。先生以吳下一諸生。兩蒙聖天子。蒲輪之徵。巡撫司道到門。速駕聞者皆驚。且羨以為希世之榮。余舊史官也。與先生有撫塵之好。急思采其奇方異術。奮筆書之。以垂醫鑑。而活蒼生。倉猝不可得。今秋訪熾於吳。江得其自述紀畧。又訪諸吳人之能道先生者。為之立傳。傳曰。先生名大椿。字靈胎。晚自號洄溪老人。家本望族。祖銑。康熙十八年。鴻詞科翰林。纂修明史。先生生有異稟。聽強過人。凡星經地志。九宮音律。以至舞刀奪槊。勾卒羸越之法。靡不宣究。而尤長於醫。每視人疾。穿穴膏肓。能呼肺腑。與之作語。其用藥也。神施鬼設。斬關奪隘。如周亞夫之軍。從天而下。諸岐黃家。目惶心駭。帖帖訾服。而卒莫測其所。以然。蘆墟迓耕石。卧病六日不食不言。目炯炯直視。先生曰。此陰陽相搏證也。先投

一劑須臾目瞑能言再飲以湯竟躍然起喏曰余病危時有紅黑二人纏繞作祟忽見黑人為電震死頃之紅人又為白虎銜去是何祥也先生笑曰雷震者余所投附子霹靂散也白虎者余所投天生白虎湯也迺驚以為神張雨村兒生無皮見者欲嘔將棄之先生命以糯米作粉糝其體裹以絹埋之土中出其頭飲以乳兩晝夜而皮生任氏婦患風痺兩股如針刺先生命作厚褥遣強有力老嫗抱持之戒曰任其顛撲叫號不許放鬆以汗出為度如其言勿藥而愈商人汪令聞十年不御內忽氣喘頭汗徹夜不眠先生曰此亢陽也服葎過多之故命與婦人一交而愈有拳師某與人角伎當胸受傷氣絕口閉先生命覆卧之奮拳擊其尻三下遂吐黑血數升而愈其他如沈文愨公未遇時胗脉而知其必貴熊季輝強壯時握臂而知其必亡皆所謂視於無形聽於無聲者其機警靈速皆此類也先生長身廣額音聲如鐘白髮偉然一望而知為奇男子少時留心經濟之學於東南水利尤所洞悉雍正二年當事大開塘河估深六尺傍塘岸起土先生爭之曰誤矣開太深則費重淤泥易積傍岸泥崩則塘易倒大府是之改縮淺短離塘岸一丈八尺起土工省費而塘以保全乾隆二十七年江浙大水蘇撫莊公欲開震澤七十二港以洩太湖下流先生又爭

之曰誤矣。震澤七十二港，非太湖之下流也。惟近城十餘港，乃入江故道。此真下流所當開濬者。其餘五十餘港，長二百餘里，兩岸室廬墳墓以萬計。如欲大開，費既重而傷民實多。且恐橋泥倒灌，旋開旋塞。此乃民間自濬之河，非當官應辦之河也。莊公以其言入奏。天子是之，遂賦工。屬役民不擾而工已竣。先生隱於洄溪，矮屋百椽，有畫眉泉、小橋、流水、松竹，鋪紛登樓，則太湖奇峯鱗羅布列如兒孫拱侍狀。先生嘯傲其間，人望之疑真人之在天際也。所著有難經經釋、醫學源流等書，凡六種。其中鉅別利弊，剖析經絡，將古今醫書存其是，指其非。久行於世。子熾，字榆村，儻易有父風，能活人濟物，以世其家。孫垣，乙卯舉人，以詩受業隨園門下。贊曰：記稱德成而先藝成，而後似乎德重而藝輕，不知藝也者，德之精華也。德之不存，藝於何有。人但見先生藝精伎絕，而不知其平素之事親孝，與人忠，墜枯粟乏，造修輿梁，見義必為。是據於德而後游於藝者也。宜其得心應手，驅遣鬼神，嗚呼！豈偶然哉。猶記丙戌秋，余左臂忽短縮不能伸，諸醫莫效。乃挈舟直詣洄溪，旁無介紹，惴惴然疑先生之未必我見也。不料名紙一投，蒙參門延請，握手如舊，相識具雞黍，為懽清談。竟日，贈丹藥一丸，而別故人李尊溪迎而笑曰：有是哉！子之幸也。使他人來此，一見費黃金十。

功矣。其為世所欽重如此。先生好古。不喜時文。與余平素意合。故采其嘲學究俳歌一曲。載詩畫中以警世云。

鄭醒愚曰。傳其人之藝。並傳其人之遭際。根本學術。經濟敷施。憂憂生新。照耀人耳目。筆曲而達。仍復博大昌明。絕不膚泛。末段綺散餘霞。峯青江上。尤適如其分量焉。

虞初續志卷九終

清 玉纏鄭澍若醒愚編

諸君簡畫記

毛先舒

杭之中稍東曰豐樂橋橋稍東曰古橋園故宋之橘苑也苑廢久種橘已盡惟有古銀杏兩株盤輪扶疏疑為宋故物云園有主為諸君君簡君簡少好畫又學篆刻喜何震陳琮刀鐫時時見古法然不甚自貴愛獨深愛畫嘗自稱先君子博學遊藝尤喜翰墨與華亭董宗伯其昌趙文學左為密交自其為童子時旁侍觀兩公用筆墨揮寫入妙蒼秀淡洩董稱最工空濛瀟瑟趙為之冠兩公分間互相放寫終不能自掩其真也君簡既好畫日取兩公畫及諸家所作玩之久而融然化裁臻微予間問君簡子此畫法誰氏君簡笑曰吾且忘吾手安知誰法予聞而惶然不復知所問矣大體得法于古人不必以甚似為工蕭遠疎逸絕蹊逕矣君簡先世多顯官尊君伯茂公豪賢多貲至君簡而日貧君簡不知貧惟日弄筆墨自娛客過索畫君簡即與畫然持錢來者甚少君簡亦耻役手為金錢或持錢贈君簡君簡便受之午突無煙君簡得錢即酤酒坐待所與密者過引壺斟酌醉而後已君簡交不濫不黷游好三

四人周旋久之。義亦彌篤。室處委巷。起居于子爾。夫君簡身不習宦。非逃者也。畫不為售。非藝者也。交不干上。非為名者也。吾於君簡。不知所以名之。雖然。豈其無得於中。而能若是與。歲既暮。銀杏葉方落矣。不知近客來亦多。遺錢否。吾當過與君簡坐。枯樹而飲。

天婚記

徐岳

山右有羊子壽者。羊叔子之裔也。子壽之祖年三十。未有家室。牧羊山中。里人以其誠實。有願為之婚者。彼力曰。德容兼備。而復厚奩資者。娶之。聞者莫不竊笑。時隆冬。南風大作。瓦石俱飛。墮一婦于庭。姿容絕艷。衣飾縞素。自言秦氏女。父母俱亡。家在真定之平山縣。頃見我亡母云。與此處羊郎行十三者。有姻緣。挾我至此。倏失我母人。咸異之。真定至汾。幾二千餘里。瞬息飄至。洵屬天緣。眾為醵資。諧伉儷焉。客有戲十三者曰。佳人之德容備矣。百兩之將。關山修阻。風姨不能致。奈何。女聞之曰。我家固巨商。有金窖於都門室中。我父母相繼淪亡。不及發。尚有老僕居焉。今我與俱往。窖金十萬有奇。皆可得也。奩資不亦厚乎。擇日往。僕已死。惟媪存焉。告以故。遂盡取地下物。即賈於京。今子若孫。以百指稱富室云。山東新城王氏。累世科甲。至今不絕。

嘗見其先立峯民部大槐記載曾祖某避難新城為傭一日大風晦冥一女子從空而墮問即萊州初氏女也晨起取火不覺至此蓋頃刻而五百餘里矣主人以為天作之合結為夫婦今之濟濟斌斌於仕途者皆初之所出也

鄭醒愚曰既得艷妻復成巨富今之作此非非想者多矣惟未知有一人能如願否覽此浮一大白

王山傳

馮景

王山者歸安縣重潮村人生六歲其父鬻於婺人范堯章為奴堯章旅寓菱湖待山有恩既而堯章老益貧山壯未有室為主經營生計旦夕盡瘁不私絲粟堯章甚誼之病革謂山曰若苦矣我妻我子不逮若之事我勤我病累月若衣不解帶目不交睫眼脂糊兩匡而炊藥不衰若苦矣我還若膏身券我死聽若所之山泣對曰奴六歲事主於今四十年恩猶父子奴之去留不在券也堯章歎息良久曰雖然子苦矣吾終還子券矣遂還山券而沒山竟留不去傭庖取直以供主母堯章僅遺樓樓二間棺停其中未葬隣火發將及樓時水涸風烈烟焰蔽空山趣主母幼主亟去主曰如柩何山曰山力能出出之不能則與柩同燼矣遂閉門拒火撫柩呼天火燎檐山

以貯水仰澆之。俄而風迴火熄。是夜焚者三百家。范氏樓獨存。康熙癸酉仲春事。馮子曰。昔蔡順母棺未葬。火逼其廬。順伏棺叫天。火遂越燒他室。長沙孝子古初。父喪未葬。隣人失火。初匍匐柩上。以身扞火。火為之滅。今又於王山見之矣。

鄭醒愚曰。山一僕耳。乃撫柩呼天。願與主同燼。則視蔡順古初事為更奇。

無名生傳

車騰芳

無名生不知何許人。遇甲則曰某姓。遇乙則又曰某姓。人終莫測也。嘗寓止維揚間。所至攜一襖被書一囊。僦室而居。亦時賣藥市中。與之言。恆諧散誕。絕口不言時事。日不火食。惟市胡餅數枚。食已即卧。夜起讀書。讀已輒哭。居人厭之。故所居恆不踰月。輒他徙。甲辰歲。予將北上。夜泊舟於無錫之柳塘灣。旁有小屋數椽。燈光隱隱。出林表。更闌後。聞讀書聲。不辨其為何書也。夜將半。聲轉淒切。已而大哭。予心奇之。擬次早踪跡其人。及旦而舟發遠矣。明年自京還。復經其處。詢之土人。言去歲有某生寓此。遇夜輒哭。未幾辭去。莫知所往。予益奇之。比抵家。又踰年。適杜子蘅若來自江陵。過予羊城寓舍。偶及善哭生事。則於去年秋寓止焦山寺中。為寺僧所逐。夜半攜書數卷。自沉於江。越數月。有虬鬚老叟。黃冠布衲。渡江訪之。詢知已死。乃乘橈江上。

溯洄竟日。是夜泊舟江岸。隣人窺之。若哭若笑。復為詩朗吟。數次投詩於江。挈舟而去。亦不知其何人也。杜蘅若云。

趙孝子傳

胡天游

趙孝子。名萬全者。父應麟。明天啟中為儒生。貧不自得。託教授去游四方。時生孝子甫晬。應麟出與家人約。後數年。即當却歸。迨久絕無有聞。其去留者。孝子長十餘歲。依於母。母勤勵機織。教使讀書。孝子數從。問父何忘返。今何在也。母持之泣。且曰。兒省憶而父甯使。父得歸。卒撫爾乎。孝子撫案大痛。即時約欲飯。夢卧不肯。自甘未幾。年十九。請其母曰。曩兒願往求父。母徒憫兒幼。勿欲許。且今稍長。能勝計疾行。母顧日月。幸必奉父還。始應麟以困罷甚。冀從他方游。且得富貴。久客。益留廢挫。迂屬懷皇帝末。劇盜攻陷京師。天下大潰。烽戈棘道路。游客者多不得歸。應麟自佗意失。又弱無他資。竟轉徙遠郡。以歿。棄其家二十年矣。孝子既獨行求父。躡淮南北。邏齊魯營薊。環燕穿楚。豫迹秦隴。寸寸徧噬虎。憐恻之場。無不薄。所值雖馬傭沽保。浮屠術師。販負役人。歌呼索食者。潛察毋敢忽。虞其父之或遁。於是也。晝從人哺糜。再日屢不得食。嘗荒險危毒。貫五六年。髮肉盡脫。易黝然。植椿然。終已不遇。心疑應麟死。

視骸骨之殘委溝野者。輒自剗指出血。遞瀉之。堅不入。乃捨去。復謳號於塗。初孝子將出。懼己不審父狀。且未即得。則張牘書應麟名。備鄉里年歲容貌。揭於背以行。久之。趣往馬邑。馬邑故山西邊。且兵燹久凋。計父老無足知。訊喻自傷罔度。所為既而旁皇邑中。遂已不得去。張文義者。縣人也。聞之。慨然遽曰。豈為越君兒乎。亟走來視。問其籍。故會稽。誦所書牘。良契文義。趣萬生過我。勉具客。吾幸識而翁。昔亡自兵中。道何從來。餘五十年。願耄老即無所寄食。窮歸我。常為我授書。甚適。方且哀其旋死也。而擲封之高。不及馬腹。手表之木。亦拱于原。得示子矣。孝子聞若言。擗地慟奔之。窀所。號血絕仆。不肯起。殞後復者數焉。已太息曰。吾初誓求父。要期生迎使還。天實靳我。必勿使克。雖然。固甚不安于藁。痛若罪腰脊。庶招魂魄歸。猶或必解吾母。竟裹應麟骨。步負以復于其家。馬邑人爭來聚觀。為泣下。少留之。不可。孝子既歸。日縗號躬。鑽塊築墓。時時悲哀望思。顧甚貧。亦不敢更出。復託教授供其母。極勞且勤。母亡。與應麟終得合葬。舍于墳三年。以康熙己巳歲卒。後四十餘年。郡縣有知其事者。為狀于開府。上之朝。表萬全異孝。詔祠之。廟賜金。俾塚石而旌其門。

鄭醒愚曰。皇天不負苦心。况孝乎。孝子之突。遇張文義。得裹父骨以歸。非天而何。

譚照字儒溪弟曉字鏡川邑東里人也家世耕讀兄弟友愛照持門戶而曉用圭頓之術治生殖產財至不訾曉無子病將死其女婿徐生陰圖利之曉不可曰宜為吾後者兄之次子培也在外人曷與焉曉既死照念弟以織書辛勤起家已掩而有之義勿忍又培好少年遨嬉之習非克家子不欲令蕩廢叔父業而培亦旋死居頃之適倭寇張甚颶風一日踔數千里直抵吾邑居民無藩籬之限將盡殲焉眾恟懼議築城以禦括公帑募私橐僅充其費十之五邑之大夫士民咸張目拱手計無所出照聞之躍然起曰吾財有所用之矣盡籍其藏得四萬餘金獻于宮城不三月而工畢一邑獲保障無虞而照竟為貧人以老至于今照曉兄弟之名與崇墉相敝設使照無此舉其財亦未必能貽之三。四世不竭也曉推其財以與兄兄用其財市義于邑以揚其弟之名而已亦與焉可謂奇士也已其事在嘉靖甲寅年。

鄭醒愚曰世之爭產爭繼至控訐不休者見此友愛兄弟實當愧死

片言保赤

沈起鳳

錢塘袁公簡齋為先大父同讜由翰苑改授上元縣令風骨錚然不阿權勢引經折

獄有儒吏風。時民間娶婦。甫五月誕一子。鄉黨姍笑之。某不能堪。以先孕後嫁。訟其婦翁。越日集訊於庭。兩造具備。觀者環若堵牆。公盛服而出。向某舉手賀。某色媿。俯伏座下。公曰。汝鄉愚。可謂得福而不知者矣。繼問其婦翁。汝曾識字否。對曰。未也。公笑曰。今日之訟。正坐兩家不讀書耳。自古白鹿投胎。鬼方穿脅。神仙荒誕。固不必言。而梁嬴之孕逾期。孝穆之胎蚤降。有速有遲。載於史冊。總之逾期者。感氣之厚。生而主壽。蚤降者。感氣之清。生而主貴。主壽者。若堯年舜祚。爾等諒亦習聞。主貴者。不必遠徵。即如僕。亦五月而產。雖甚不才。猶得入掌詞垣。出司民牧。謂予不信。令汝婦入問。太夫人可也。某唯唯。即命婦抱兒入署。少選。兒繫鈴懸鎖。花紅繡葆而出。婦伏拜地下曰。蒙太夫人優賞。許螟蛉作孫兒矣。公正色謂某曰。若兒即我兒。幸善視之。他日功名。勿使出我下可耳。繼又顧眾笑曰。爾眾中有明理之士。幸諒予心。勿以前言為河漢也。眾齊聲附和。於是兩家之疑盡釋。後兒讀書。食餼於庠。奉公長生祿位。朝夕供養不衰。

鐸曰。含垢納汙之說。為臨民者言。此印板律例。非讀書人不能解也。然捨身以保赤子。類非守經者所能。公殆現不壞身。運廣長舌。向訟庭為眾生說法耶。

黃蓋以武人而治石城。况鍾以小吏而治吳郡。後如馮堅王興宗輩。或以典史或以直廳。故王晉溪謂吏治之善。不必出於甲科。然遇此等公案。豈是無學人杜撰得來。蓋不熟晉庫之論。失油絡者。必受飛災。不讀周易之文。授沐枕者。終成冤獄。學優則仕。旨哉是言。

鄭醒愚曰。居民上而果能片言化民。民相率而化於禮義。豈特保一赤子已哉。

徐夫人受封記

袁枚

尹文端公母徐氏。江甯人。為相國子妻。相國家法嚴。文端總督兩江。夫人猶青衣侍屏。匿文端調雲貴入覲。世宗從容問汝母受封乎。公叩頭免冠。將有所奏。世宗曰。止。朕知汝意。汝庶生也。嫡母封。生母未封。朕即有旨。公拜謝出。相國怒曰。汝欲尊所生。未啓我而遽奏。上乃以主眷壓翁耶。擊以杖。墮孔雀翎。徐夫人為跽請。乃已。

世宗聞之。翌日命內監宮娥各四人。捧翟華。至相國第。扶夫人榻上。代為櫛沐。衿服。襖飾。花釵。燦然八旗。命婦皆嚴妝來圍夫人。而賀者相環也。頃之。滿漢內閣學士。捧璽書。高呼入曰。有詔。相國與夫人跽。乃宣讀曰。大學士尹泰。非藉其子繼善之賢。不得入相。非側室徐氏。繼善何由生。著勅封徐氏為一品夫人。尹泰先肅

謝夫人再如詔行禮宣畢。四宮娥擁夫人南面坐。四內監引相國禮夫人。夫人驚蹴踏欲起。四宮娥強按之不得動。既乃重行。夫婦合卺。結禱之儀。內府梨園亦至。管絃鏗鏘。肴烝紛羅。諸命婦各起持觴。為相國夫人壽。酒罷大懽笑去。後三十年文端側室張夫人受封。文端奏謝恩。奏及之。上曰。朕實不知。先帝有此事。乃竟暗合。豈非卿家之運耶。公繼室鄂夫人。鄂文端公猶女也。兩文端相見。鄂老矣。嘆曰。吾日夜思抽身退。未知能否。夫人曰。女聞古之君子。事君能致其身。又曰。明哲保身。未聞有抽身者。兩文端為之莞然。

邨邑人士小傳

鄭方坤

閩人鄭方坤曰。邨鄴本趙郡。古稱多慷慨悲歌士。間從歷覽之餘。見夫紫葛諸山。扶輿蜿蜒。從太行千里而來。怪石盤陀。可遠觀而不可褻玩。而漳滏雙流。淨不可唾。如輪如帶。作撥金戛玉之音。人傑地靈。固當以志節文章顯然。自百十年來。誌乘缺如。一二先達貴人。尚籍籍在人口。餘則惓矣。以彼懷清履潔。文彩爛然。顧乃匿影銷聲。終老牖下。歎天公之憤憤。去白日之昭昭。曾不如枯莖宿莽。猶能留根莖于人間。嗚呼。有賢不彰。豈非官斯土者之責。與不佞用是心惻。故于百里內外。凡所過村塾。禪

室必停車。所遇筮叟醫翁必相延訪。所見殘碑斷版以及投溷覆甌之塵有存者必搜剔摩挲不忍釋手。或因文以得其人或因人以徵其事。有芳皆擷無隱不彰。彼其所挾藝能固未必傾臻詣極然亦具有瀟灑出塵之姿。豪邁不羣之韻。彼其用法自用雖未必粹然一軌于正然固不掩其嚶嚶自喜之習。與夫踽踽涼涼不屑不潔之概。傳曰人三為衆矧今又倍於以矧俗骨而振頽風顧不偉乎。昔孫子荆有言其山巖巍而嵯峨其水泔渫而揚波其人磊阿而英多竊援斯語為邯邑表士風即為邯邑人士作傳贊云。

劉續郃字高風少補弟子員有文名性孤潔不可一世衣冠動作迥與人殊每風日晴和輒出遊于市手一編且行且讀衆咸以狂目之不顧也設帳于東明觀問字者履常滿說經鏗鏗尤熟于歷代史抵掌談成敗如親見之間及忠孝節義事則色飛眉舞或泣下沾襟不自禁嘗游西韓巨室乃素所受業者念先生貧瀕行奉一篋金為壽詰旦則招他弟子十數人至曰與諸君別久矣未知所詣何如請試一文最佳者以此金贈有程姓者壓卷即倒篋授之竟徒步歸門人張某嘗乘間問曰人言師狂生不以為然則笑曰人狂我狂我焉得而不狂也既而歎曰命固然矣跡其行事殆

古所謂嶽崎歷落人耶。

張鎮嶽字崧高。弱歲能文。下筆如兔起鶻落。奇氣勃勃。從十指間出。為諸生試。輒冠其曹。熊鍾陵先生者。以宿儒督學畿南。視斯世文。無一足當意。即所拔前茅士。當廷謁。頃擲試卷與讀。輒罵。繼之以扑。諸學宮弟子。悉股栗。顧獨咨賞。鎮嶽文曰。若張生者。誠所謂鷲鳥。累百不如一鷲者矣。然鎮嶽殊落拓。又耽酒。每沉醉。入棘闈。逮納卷。出宿醒猶未解。以此輒報罷人。或尤之。笑曰。非醉也。命也。易一命。即隽矣。自是不復省試。日橐產佐酒。產盡。則以書畫玩好之屬。入酒家飲。嘗客遊于永年。武安。因其文。以取科名者。蓋十數輩。著作甚夥。嬾不自收拾。存者什一二耳。後竟以酒病而卒。

李桂品。字蘭如。邑諸生也。博學善辯。膽氣絕人。明季館於武安。方講業。忽土寇至。以刀擬之。則大怒。踞案叱曰。若何為者。吾邯鄲李蘭如也。俄而一錦衣怒馬者入。曰。聞李先生名久。未辨真偽。答曰。何偽也。曰。果真耶。請為數二十八將名。則為屈指數數。已。因掀髯太息。言曰。此皆古烈士。夫奮其智勇。際會風雲。拯生民於塗炭。紀勲業于旂常。視彼赤眉銅馬。昧于逆順之機。名污簡編。而身膏斧鑕者。智愚賢不肖。何如也。寇大歎服。戒其黨即遠去。毋溷李先生為也。後以連不得志。鬱鬱成心疾。間月一發。

發則泣罷鼓歌莫能自遏平生所最契者惟劉高風張松高二人一日忽揭通衢以某日於某所開講既至寂不發一言或請之曰無解人既劉高風至乃言曰今人不但不知書理乃亦不識字義即如子字應作了頭兩點乃回頭顧母也高風大慟曰吾無母可顧矣奈何二人相抱而哭竟日乃罷後以病卒無子

冀遜字長石按察使光祚之孫聰穎能文少即工書法古帖臨摹不下數千編每構一筆必凝精聚神而成之閱十餘年技益進出入于褚河南米襄陽之間而自為一體家臨滄水之濱求書者趾相錯性顧簡傲不受人逼促遇所欣適即猥妓賣菜傭以敗素零紈請者罔弗應其有不可即當路貴人賫金帛來輒麾使去曰昔陶淵明不為五斗米折腰後世稱之吾亦豈肯以阿堵物役吾腕耶其所作七言小詩最楚楚有致年僅三十二而卒長轡未聘而蘭玉早凋吁其可惜也夫

郭璽一名西字楚玉水村其別號志趣高潔有泥塗軒冕之風少即棄去舉子業不事於先人墓田側築室數楹蒔花種菜蕭然有以自樂好讀書尤工為有韻之言時曲周劉半舫先生主詩壇物色之引而置諸騷雅之林於是三輔人士無不知有郭水村也者其咏新月句云隔水森疎樹依山覺晚晴登山句云碧落含清景鴻濛養

翠微遊元園句云。隔屋邀山。兼寺影。閉簾選樹帶。溪聲。招同社句云。小窻細雨春如夢。好友孤燈話。即詩讀其詩。想見其為人。冷韻遙情。誠哉長江之別派。而笠澤之橫枝也。

馬鉅任者。失其字。自號小顛。髫年補諸生。縱酒吟詩。好為詼諧曼衍之談。深博無涯。涖即善辨者。不能折。業師張某聞而歎曰。此子固大佳。然見地太超。才鋒太露。終非有成器耳。閱數年。忽棄家去。莫知其所往。居久之。有僧至邑西之靈芝寺。趺坐竟日。不發一語。識之者曰。此真小顛也。強之歸。逼於親黨。返初服。更名應試。復以第一食餼於庠。一日五更起。乘家人睡熟。亟啓戶遁。再祝髮。往來林慮百泉間。遂下吳越。泝黔楚。歷岷峨。衡湘諸勝。釋名行願。號萬峯禪師。嘗以牛。米。火。水。四字。縱橫顛倒作。玄機。人不能測。所居蘭若。招提。無定所。有以巾拂付者。則謝去。癸亥前人猶見之。甲子後。遂滅其跡云。

鄭醒愚曰。任民社者。留意人才。此先大夫宰邠時所作也。各傳贊頌。上添毫。允為邠邑生色。

丙子六秩自述書付子姪

夏之蓉

投老殘年。忽忽六十。撫念疇昔。愾焉興懷。為仿史公自叙之例。述一生梗槩。以告我後昆。余八九歲時。不與羣兒伍。聞諸兄讀古書。輒竊聽之。錄於矮紙中。作課誦。嘗隨大父食蟹。匡積膏不食。問何為。曰。將以奉母。大父喜。語人曰。是兒有至性。比長。從諸兄學。一目五行可下。見古人篇籍。似有夙契。年十九。吾父見背。家道中落。益刻苦學問。周禮尚書三禮一抄。毛詩左氏春秋再抄。史記漢書節抄。漢唐宋元明諸家文章抄。今諸本具存。凡詳批密註。逐加丹黃者。悉吾二十歲以前所誦習也。大父嘉予好學。鍾愛特甚。頻以衣衣我。以酒食勞我。時值歲祲。益貧困。諸兄舌耕於外。吾母屏當家計。日苦不給。予與嘯門居一柳書屋中。枵腹伊吾。不敢使母知。時或分半餅作食。日當午。忘櫛髮盥面。寒夜無膏油。嘗擁被坐。月光下。手持一編。冥思苦吟。不知雞之三唱。丁酉歲。與嘯門同入鄉學。明年渡湖館龍岡吳氏地僻。無交游。得縱觀古人之書。積勤致疾。鼻血涌出。左目不見物。歸而調息者歲餘。得復明。乃更銳意進取。與同學羅君睿思茅君心友輩。聯文社。張設旗鼓。各不相讓。予性喜朴素。衣服不求靡麗。少時一布袍服之。近二十年。兒輩每以為言。予曰。人之重輕。豈關服飾。大凡內不足。乃借資於外。每見後生冠綦鮮好者。卜其中無有也。飲酒可三升許。食不計豐腴醯醢。

殖鹽鼓怡然甘之。一切絲竹之娛禽鳥之玩皆深惡痛絕。非其所好。足跡所經及天下之大半。其在北者為齊魯燕趙。在東南者為吳越閩南粵楚豫。所過名山大川如趙岱匡廬金焦武夷。祝融羅浮九疑太室少室以及南海之大盤江之長沅湘之清錢塘之壯黃河之濶洞庭彭蠡震澤之汪洋蕩汨。或登涉其巔。或挂帆蕩槳於蘆洲蓼渚之曲。遇會心處。悠然神遠。尤喜中夜欵乃聲。以為霜清月白聽之。生人遐想也。遭時聖明。四膺衡文之任。所在援孤寒。遠英俊。砥俗已庸。立之準的。紫奪朱者斥之。鄭亂雅者黜之。當時士子有為駢語頌予者。曰機優雲秀。辨以幾微。盧後玉前。處之確當。蓋實錄非虛語已。且其為功亦不止於文章之事者。當在程鄉時。平樂令某黨於鄉之豪暴。誣諸生姚泉張湘以下七人罪。幽之囹圄。凡六閱月。數請褫予廉得其狀。按郡曰。趣赴試。為令所格。不得前。復嚴檄之。三日乃至。至則髮長五六寸。僂僂然盜囚也。諸生號哭伏地陳寃狀。予為力請於中丞策公。得釋。令旋奪官。平樂人謬欲以生祠祀我。當在岳州時。華容令某貪酷吏。士民疾之如仇。予校士演武廳。突擁千餘人環控。聲言令且出。當羣毆之。眾口洶洶。莫敢誰何。予從容下階立叱之曰。爾輩何為。將為翫法之民耶。翫法者當斬。丞還其牘。眾俯首避去。後中丞開公欲案其事。以

狀詢予復之曰。所謂千餘人者。蓋環立觀射者耳。牘已還。無由得主名者也。事遂寢。未幾。令亦奪官。是其為功。殆亦不止於文章之事也。先是。予秉鐸監督。值歲荒。憲司委令捕蝗。查飢戶。平糴糶。給南北二廠糜粥。隨在整飭。皆有裨益。生平叨國士之目者。四人。十九歲時。從西受王先生遊。以傳燈見許。批予文曰。視之若近。即之始遠。眼中未見如此人。癸丑。捷南宮。謁坐主。溧陽任先生謂予曰。子之文。在近日為廣陵散矣。為嘉歎者久之。丙辰。擬南郊瑞雪賦。孝感涂先生一見嗟賞。目為軼才。即保送鴻詞科。甲子。列試差第一。鄂相國西林謂予文蘊藉深遠。迥出時輩。此四先生者。品隲各殊。而叨國士之目。一也。生平知己三人。少未聞道。多汨溺於詞章。迨與王君書臣交。從事濂洛關閩之學。戲言戲動。必正色規之。此直友也。滇南傅君謹齋。予同年生。儻居近三載。龐鴻之氣入我肺腑。此諒友也。息園齊君博雅之士。每與商榷經史。窮源竟流。若繩貫而璣組。此多聞友也。孔子所云益友。不綦備矣乎。生平所得士。凡四人。其一為鹽城樂甯侗。字孩夫。品端學邃。力追古人。今以明經老矣。其一為建甯朱仕琇。字梅崖。甲子科所取解元也。其一為南海茹敦和。字三樵。本浙人。僑居粵東。今成進士。其一為山陰周大樞。字元本。壬申北直鄉闈。本房卷。是皆沉冥幽默。不求聞

達之士而吾獨於語言文字外窺其本原識其底裏摳衣北面用以自豪然終不敢以門弟子之禮禮之者也昔人嘗言險厄中有鬼神予親歷之丁酉鄉試病卧號舍中聞有呼起起者再少頃嘯門至以羹湯迫予飲甫起而壁崩得免壓焉泊蘇州寶帶橋颶風作船纜絕昏黑中掀蕩十餘里得淤沙尼之止比曉閱視則上下亂石齒齒僅一隙可容舟粵東院署舊有祠祀鬼神無主者數為厲以文禱之跡遂滅過洞庭湖驚風拍天遙見波濤中二巨人逐水面行如飛既乃掠舟去此類聖賢所不道而事蹟彰顯如是天道恢恢亦可畏哉予素以迂拙自守與人交不為谿刻蘄絕之行亦不喜發人陰私有欺我者雖覺未嘗發露下逮臧獲悉御以寬見人不足恒矜憐之縱解推無多而意常有餘不善營殖亦不工會計凡器用價直之低昂米鹽出納之多寡惟人指撝不屑屑綜核然財用竭則復來生平亦未嘗匱乏少學為詩十二歲咏中秋月即為大父所賞嗣官翰林與諸公酬倡無虛日在楚粵間題咏尤富始宗少陵繼辦香於玉局今則以陶韋為歸宿矣所著詩二十卷古文八卷經解八卷史論十一卷雜記八卷俱已成帙近復手目料揀稍不愜即重加釐正歐陽子有言吾不畏先生畏後生耳正今日之謂也予所居宅即鶴來堂舊址大父所經營創

建者析箸時分屬吾伯今歸子宅東隙地數畝向為菜圃乙亥仲春斬荒流歲構別業九間短簷淨几其窻四闢中積古書數百卷櫛比鱗次坐卧其中足以娛老子姪數輩萃處課藝間亦陳說古今夜分不寐長孫十齡解行文為條疏其義例幼小者牽繞衣裾分棗栗與之古云名教中有樂地誠哉是言老而視不加眊燈下能於紅箋上作細楷耳亦聽喁喁私語雖遠必聞齒僅脫其二餘皆牢固蟹螯菱角尚能自喫鬚有一莖兩莖白者拔之亦不復生腰脚甚健前登紫琅山捫蘿躋險不見苦虺賓客譽我皆云似四十以上人攬鏡自照無龍鍾態或者其亦非諛我也今年七月值六十生辰兒姪輩謀作梨園之戲或云當乞言親串予笑謂之曰嘻爾之所以祝我者未若我之自祝也昔大父八十有五神明不衰一時欽為國瑞此於百中什一耳吾父捐館舍時僅五十有二吾同懷兄弟七人或二十餘而卒或三十或四十餘而卒惟筠莊兄五十有八皆未有至六十者今獨予與嘯門兩人存而予得先周甲子緬懷往事致為難矣况齊眉老妻矍鑠猶昔爾輩顯名科第不墜家聲孫枝駢聯統騰予以康健之身生太平無事之日仰蒙帝帝澤退歸鄉園坐半舫齋于子徐徐看花翫月但酌我大觥我樂已極何事粉榆子弟耶至親串壽言大半數陳套語其

於我一生力學之勤秉性之儉居官之慎取友之端待物之誠邀福之厚未必能如
自道者之親切有味也用是約撮梗槩具述於斯以為今日祝嘏之詞也可以為他
日作行傳作墓志之取資亦無不可

儲學坡曰自道甘苦不用一幫貼語而德行文章事業皆於言外見之其段落起
伏直是變化因心昔王弼州贊歸熙甫云千歲有公繼韓歐陽斯文同此嚮慕
戴燕貽曰散散叙去而提挈關鎖照應之法無不該其中有濶大處有細瑣處皆
從史記得來

蓋宮仙史

樂宮譜

乾隆癸卯春金谿楊孝廉英甫為扶鸞之戲有女仙降壇署曰蓋宮仙史自叙為宋
祥符間人貴願早逝遊於閨風之苑獲遶上元夫人命居蕊珠宮掌玉女名錄云云
為詩詞操筆立就淒艷絕倫叩其生時事蹟終不肯言固請再三輒書曰噫豕煙燈
穗中隱隱有彈淚聲繼有黃素水者至亦女仙也於仙史為中表姐妹並有文藻遂
雜書仙史閨中軼事數十條皆雋異可喜予從兄木虛手錄成帙惜不盡記憶今紀
其畧云仙史姓薛氏名瓊枝湘潭人年十七才艷絕世隨父某守杭州遂家焉所居

曰問花樓俯臨西湖雲樹煙波凭檻可接性愛蘭手植千百本衣袖裙衩皆喜繡之
或書為冊卷花葉左右題句殆遍嘗謂人曰此花逸韻幽香自是我輩後身當倍加
珍護毋令與衆芳伍也閣中置書數百函竟日靚粧焚香展對風日清美輒命畫
造萬花叢中吟賞忘倦既恐有踪跡者遂於清夜易裝紫衣烏帽乘白雲駒侍女數
十人皆綠衫短劍累騎從行於時芙蓉秋放笙管暮停鏡水澄鮮佳月流素徒倚湖
亭自製新曲聯袂歌之聲振林樾鷗鷺驚翔興酣更拔佩劍起舞陸離頓挫與歌聲
相應於是劍光月光花光水光交相映發湖中一草一木皆有歌舞之態萬舟如蟻
集觀亭外寂然無譁翌日爭傳以為真山下臨皆莫知其為太守女也久之徙湖上
得畫卷一旁有題句云夢裏湖山是也非向人楊柳自依依六橋日暮花成雪腸斷
碧油何處歸惘然神傷遂不復出每當疎雨垂簾落英飄砌對鏡自語泣下沾襟疾
且篤強索筆自寫簪花小引旋即毀去更為仙裝倒執玉如意一柄侍兒旁立捧膽
瓶插未開牡丹一枝凝視良久一慟而絕著有問花小橐四卷今無傳本降壇詩甚
多余尤愛其絕句懷湘君云數行征雁起平沙暮雨泣寒杜若花欲撥空船迎帝子
濕雲封處竹枝斜答黃素水云歸真猶許住蓬萊回首前塵亦可哀莫問問花樓外

樹六朝金粉已成灰。又有片雲同我墜。明月向誰多。春日媚楊柳。野風香菜花之句。仙乎仙乎。此篇得於吳君蘭雪。余絕愛之。並錄於此。

書麻城獄

麻城涂如松娶楊氏。不相中。歸輒不返。如松嘆之而未發也。亡何涂母病。楊又歸。如松復毆之。楊亡。不知所往。兩家訟于官。楊弟五榮疑如松殺之。訪於九口塘。有趙當兒者。素狡獪。謾曰。固聞之。蓋戲五榮也。五榮駭。即拉當兒赴縣為証。而訴如松與所狎陳文等共殺妻。知縣湯應求。訊無據。獄不能具。當兒父首其兒。故無賴。妄言請無隨坐。湯訪。唆五榮者。生員楊同範。虎而冠也。乃請褫同範緝。楊氏先是楊氏為王祖兒養媳。祖兒死。與其姪馮大姦。避如松毆。匿大家月餘。大母慮禍。欲告官。大懼。告五榮。五榮告同範。同範利其色。曰。我生員也。藏之。誰敢篡取者。遂藏楊氏。複壁中。而訟如松。如松故逾年。鄉民黃某。瑾其僮河灘。淺為大爬。噉地保。請應求往驗。會雨。雷電以風。中途還。同範聞之大喜。循其衣衿。笑曰。此物可保。與五榮謀。偽認楊氏。賄仵作李榮。使報女屍。李不可。越二日。湯往屍。朽不可辨。殮而置。揭焉。同範五榮率其黨數十人。聞於場事。聞總督邁柱。委廣濟令高仁傑重檢。高試用令也。覲覲湯缺。所用仵作。

薛某又受同範金竟報女屍肋有重傷五榮等遂誣如松殺妻應求受賄刑書李獻宗舞文忤作李榮妄報總督信之効應求專委高鞫高掠如松等兩踝骨見猶無辭乃烙鐵索使踞肉烟起焦灼有聲雖應求不免皆不勝其毒皆誣服李榮死杖下然屍故男也無髮無脚指骨無血裙袴逼如松取呈如松督亂妄指認抵攔初掘一家得朽木數十片再掘井木無有或長髯巨靴不知是何男子最後得屍足弓鞋官吏大喜再視髑體上鬚髮白髮又驚棄之麻城無主之墓發露者以百數每不得又爰如松如松母許氏哀其子之求死不得也乃剪己髮攜去星星者為一束李獻宗妻刖臂血染一袴一裙芥其亡兒棺取脚指骨湊聚諸色自瘞河灘而引役往掘果得獄具署黃州府蔣嘉年廉其詐不肯轉召他縣忤作再檢皆曰男也高仁傑大懼詭詳屍骨被換求再訊俄而山水暴發井屍衝沒不復檢總督邁柱竟以如松殺妻官吏受贓擬斬絞奏麻城民咸知其寃道路洶然卒不得楊氏事無由明居亡何同範隣嫗早起見李榮血模糊奔同範家方驚疑同範婢突至曰娘子未至期遽產非嫗莫助舉兒者嫗奮臂往兒頸拗胞不得下須多人搯腰乃下妻窘呼三姑救我楊氏闖然從壁間出見嫗大悔欲避而面已露乃跪嫗前戒勿洩同範自外入手十全

納。嫗袖手搖不止。嫗出語其子曰：「天乎！猶有鬼神，吾不可以不雪此冤矣。」即屬其子持金訴縣。縣令陳鼎海寧孝廉也，久知此獄冤苦，不得聞，聞即白巡撫吳應棻。吳命白總督。總督故邁柱，聞之，以為大愚，色忿然，無所發怒。姑令拘楊氏，陳陰念拘楊氏稍緩，或漏洩，必匿他處，且殺之滅口。獄仍不具也。乃偽訪同範家畜娼，而身率快手直入毀其壁，果得楊氏。麻城人數萬歡呼，隨之至公堂，召如松認妻，妻不意其夫狀焦爛至此，直前抱如松頸大慟，曰：「吾累汝，吾累汝。」堂下民皆雨泣。五榮同範等叩頭乞命，無一言。時雍正十七年七月二十四日也。吳應棻以狀奏，越十日而原奏勾決之。旨下，邁柱不得已，奏案有他故，請緩決。楊同範揣知總督意，護前乃誘楊氏具狀稱：「身本娼，非如松妻，且自伏窩娼罪，邁復據情奏。」天子召吳邁兩人，具內用，特簡戶部尚書史貽直督湖廣，委兩省官會訊，一切皆如陳鼎議，乃復應求官，誅同範五榮等。

袁子曰：折獄之難也。三代而下，民之譎觚甚矣。居官者又氣矜之隆，刑何由平。彼枉濫者何辜焉。麻城一事，與元人宋誠夫所書工獄相同，雖事久卒，白而鞫，鞫變幻危乎艱哉。慮天下之類是而竟無平反者，正多也。然知其難而慎焉，其於折獄也庶矣。

此吾所以書麻城獄之本意也夫

鄭醒愚曰歲壬子同鄉魏簡齋偕其親串湯蓋忠自西粵來主余家述其祖應求公令麻城以楊涂訟事幾罹不測人知其冤莫誰何也既而獄直好事者為譜傳奇名一線天云因屬余為文記之以告後來壬戌得子才集讀之則書麻城獄一篇與蓋忠所述不爽毫髮遂焚余文蓋余之文或冀以麻城之事而傳得子才書之則奸民之詐偽猾吏之譁張盡情畢露應求公以斯文而不朽矣文字攸關豈淺鮮哉

王王屋傳

周亮工

蘭陽王王屋初名澤久字春脚後更名斤母李氏孕公公鳴於腹生而敏給善諧詭里中人率以為狂士也舉於鄉戊辰計偕度已文必入彀某公方分校春秋某方與瑯涉公不欲出其門論中故為詆語首云儂觀天下事未復雜以戲劇事撤棘後則某果已魁公及閱所為論始有病狂喪心之評後某終以瑯累里人始知公非狂者辛未公仍以春秋魁多士除滋陽令公銳自見又倅急剛鯁會王孫市磔人公執笞獄行立忤諸王孫黨搆之直指弗察暴劾公檻車徵繫公雖廿日令然頗有惠聲其

逮也。士民數千人攀轅痛哭。白日慘黯。遮愬緹騎。自卯至申。不得前。甚有矇矓孤貧。鳩杖鶉衣。亦視力投金錢。檻車。贖之。且環而稽首。緹騎曰。無苦令。令清苦官幾日耳。且泣且拜。緹騎咸為揮涕。下刑部獄。瀕死。賴惜公者。力爭僅免。謫睢陽尉。年三十四。憤志失志死。自預為誌銘。以退之銘人者。如銘己。即取以自銘。世共達之。公著詩一卷。文二卷。詩清婉有致。文則力追昌黎柳州。倘假之年。正未可量也。予憐其志。為序而梓於秣陵。

鄭醒愚曰。廉潔峭厲。文如其人。